
Title	Editorial Sekata Jan 1992
Author(s)	Muhammad Ariff bin Ahmad

Copyright © 1992 Muhammad Ariff bin Ahmad

Mei 18 1992

Editorial SEKATA Jan 1992

Bahasa adalah manifestasi budaya sebagai penilai perhidup manusia yang beradab. Tanpa bahasa manusia tidak berbicara; maka bahasa Melayu yang terguna oleh jumlah manusia yang kelima terbanyak di dunia ini, sesungguhnya merupakan manifestasi budaya Melayu yang menyerlahkan kehalusan budi pekerti, hemah dan aspirasi bangsa Melayu itu sendiri.

Maka itu, slogan **bahasa menjunjung budaya** itu telah dikemukakan oleh Jawatankuasa Bulan Bahasa 1990 dan akan terus digunakan sebagai motto bulan-bulan bahasa yang akan diadakan pada masa-masa yang akan datang. Walaupun bahasa itu adalah satu daripada aspek budaya, namun ia mempunyai fungsi khusus terhadap kebangunan dan kemajuan budaya itu.

Pelaksanaan bahasa tanpa menghiraukan nilai budaya akan menjadikan bahasa itu hanya merupakan pengucapan-pengucapan atau tulisan-tulisan yang tidak bermakna. Bukan tidak pernah kita temui orang berbicara yang tidak dapat kita tanggap mesej percakapannya. Kesan bicara seperti itu, biasanya, menimbulkan sengkita yang terbit daripada salah faham antara pembicara dengan responden.

Justeru kerana itu maka bahasa menjadi suatu ilmu yang dipelajari tata-bahasanya, dipelajari rukun dan syaratnya, dipelajari nilai budayanya. Dan, bahasa itu dipersoalkan betul salahnya atau diperkatakan indah tidaknya. Kadang-kadang orang berbahasa dengan tatabahasa yang betul - betul morfologinya; betul sintaksisnya - tetapi tanpa nilai budayanya; maka penutur bahasa itu tidak dapat dianggap orang yang 'reti bahasa'.

Misalnya seseorang berkata: "*Amboil Indahnya anjing perempuan yang sedang menyeberang itu!*"

Melihat kepada tatabahasanya, wacana yang dituturkan orang tadi, tidak ada apa yang salah - morfologinya, sintaksisnya, frasiologinya betul belaka - tetapi jika diperhatikan nilai budayanya, wacana itu tidak dapat dianggap bahasa yang tepat dan murni.

Menurut kebudayaan Melayu, kekata **Indah** dan **perempuan** tidak sesuai dipakai bagi *anjing* [atau lain-lain haiwan]. Kekata **perempuan** hanya boleh dipakai bagi manusia; tidak kira manusia itu orang jahat atau orang baik.

Editorial Sekata 2

Dalam Bulan Bahasa 1990 dahulu, terdapat beberapa kegiatan bahasa yang nilai budayanya telah terabai. Keadaan ini tampak begitu ketara kerana kebetulan Bulan Bahasa itu dilaksanakan dalam rangka sambutan Bulan Budaya Melayu. Bagaimanapun, hal-hal seperti itu telah dibincangkan, maka mudah-mudahan ia tidak akan berulang apabila kita sambut Bulan Bahasa 1992 yang akan dilaksanakan dalam bulan Februari, insya Allah.

Suatu hal yang menarik dalam perasmian Bulan Bahasa 1990 itu ialah pelancaran sebuah buku terbitan Berita Harian/Berita Minggu yang berjudul **bahasa jiwa bangsa**. Rasanya, buku itu bukanlah diterbitkan semata-mata mengambil sempena Bulan Bahasa dan Bulan Budaya Melayu dalam rangkan merayakan 25 tahun kemerdekaan Singapura, tetapi juga ia dimaksudkan untuk menjadi bacaan dan renungan pembaca umum.

Pengerusi Bulan Bahasa yang juga Pengerusi Jawatankuasa Bahasa Melayu Singapura telah menyatakan harapannya agar pelancaran buku karya penulis setempat pada hari perasmian Bulan Bahasa itu akan menjadi satu permulaan yang akan menjadi amalan berterusan. Maksudnya, mudah-mudahan dalam perasmian Bulan Bahasa 1992 dan yang seterusnya akan ada pula buku-buku demikian yang akan dilancarkan.

Sama-samalah kita tunggu masanya harapan itu akan menjadi suatu kenyataan. Dan, apabila harapan itu sudah menjadi kenyataan kelak, sambutan yang menggalakkan lagi positif oleh masyarakat pembaca pula adalah sangat dialu-alukan.

sekian.